

# L'onn dals linguatgs – 2001 è stà l'onn europeic dals linguatgs

DAD ANDREA L. RASSEL

■ **L'Unìun Europea deditgescha mintg'onn ad in tschert tema. Quest onn èsi la tematica da las muntognas, l'onn passà è stà l'onn dals linguatgs.** Las instituziuns linguisticas en tut l'Europa han fatg gronds sforzs da far attent la populaziun als linguatgs. Las undas da quests impuls èn tschessadas, i para d'esser temp per ina egliada enavos.

## In bun temp per in onn dals linguatgs

Ìls carstgauns fan diever dals linguatgs per communitgar gia dapi millis dad onns. I dat passa 6000 linguatgs sin noss mund e blers dals linguatgs moderns existan gia dapi plirs tschientaners. Partge lura dedichar in entier onn als linguatgs e quai gest ussa? Respota pon forsà dar trais puncts fitg actuals. L'onn 2001 è stà a la fin d'in decenni cun midadas drasticas e dramaticas pertutgant ils linguatgs. L'emprima è franc il svilup da l'englais en in linguatg propi global, la segunda è la schientscha creschida che blers lin-

guatgs èn muribunds, la terza è la campagna triumfala da l'internet cun ses effect immens sin ils linguatgs.

## Englais sco linguatg global

In motiv relevant per l'utilisaziun da l'englais en moda globala è segir che pli e pli blers carstgauns vulan communitgar in cun l'auter per motivs politics, commercials u culturals. Per exempel è il dumber da commembers da l'ONU creschì da radund 50 sin la cifra actuala da 189 entaifer ils davos 5 decenni. Sin ils chomps da l'aviatica, da la scienza e da la tecnologia dominescha l'englais gia dapi ditg. Quels secturs vignan adina dapli impurtants e cun quai era l'englais. Quasi mintga trend cultural internaziunal en ils davos 50 onns è vegnì stgaffi en in pajais anglofon. Resultat da tut quests process è ch'il dumber da personas che discurren englais è creschì enormain. In quart da la populaziun mundiala fa diever da l'englais, ma be gist per ina da quatter personas che dovràn quest linguatg è l'englais la lingua materna.

## L'onn 2100 vign la mesadad dals linguatgs ad esser sparida

Ina da las consequenzas che l'englais è duvrà globalmain è segir che blers linguatgs han fadia da surviver. Bleras personas sutvaliteschan lur agen linguatg en favur da l'englais. Ma dar la culpa per la mort da tscherts linguatgs a l'englais è franc simplifitgà memia bler. Linguas èn sa svilupadas e scumparidas trasor en l'istorgia umana. Ma las prognosas dals scienziads che la mesadad dals passa 6000 linguatgs vign ad esser sparida en fin l'onn 2100 fa propi in pau tema. Quai munta gea ch'ina lingua mora mintga duas emnas. Ma era quella prognosa fitg negativa po avair consequenzas positivas. Sche la schientscha dal privel mortal da nossas linguas è dasdà, pon ins cumbatter la tendenza negativa per linguatgs minoritars. Buns exempels nua ch'ins ha reagì al privel da perder in linguatg e cun quel ina cultura èn la charta europeica per las linguas minoritars u regionalas u l'artetgel 70 en la constituziun federala.

## Lingua ed internet

In dals plets novs dal decenni avant l'onn

dals linguatgs è stà «la vischnanca globala». Las distanzas sin noss mund èn vegnidas pli curtas. Responsabel per quest fenomen è sper la mobilitad creschida segir era l'internet. Il world wide web è vegnì inventà dals 1991 ed è creschì dapi lur en dimensiuns immensas. L'internet ha stgaffi ina nova alternativa per la comunicaziun. Las qualitads da quella alternativa sa chattan insanua tranter il linguatg scrit e la lingua discurreta. Auter che sche nus discurren visavis na datti nagina reacziun immediata u perfign parallela a quai che nus schain. Linguatg sin l'internet nun è permanent sco linguatg scrit, sche nus pensain a paginas da gasettas sin l'internet che sa midan avant noss eglis, sch'i dat novas infurmaziuns. Ina qualitat centrala che la rait porscha è franc la spertadad e la derasaziun globala. Gest per linguatgs minoritars che nun avevan las resursas finanzialas per derasar infurmaziuns preschentadas è l'internet ina enorma schanza. Ni distanzas lungas, ni muntognas èn impediments per l'internet. I nun importa finanziailmain sch'ins cuntanscha 10 u 1000 personas. L'internet è in vehichel ideal per promover la diversità linguistica.